

<><><><><><>

Headlines

- जम्मू-कश्मीर च पैहले चरण के असैम्बली चुनाएं तैहत् 7एं जिलें दिएं 24 विधानसभा सीटें पर अज्ज भारी मतदान होआ ऐ।
- जम्मू-कश्मीर च दुए ते त्रीये चरण दे असैम्बली चुनांS लेई बक्ख-बक्ख सियासी पार्टिं दे नेता मतदाताएं गी अपने पक्ख च करने लेई रैलियां करै करदे ना। प्रधानमंत्री नरेन्द्र मोदी होर कल श्रीनगर ते कटरा च रैलियां करडन जिसलै के कांग्रेस दे स्टार प्रचारक सचिन पायलट होर जम्मू च चुनावी बैठकां करडन।
- सरकारै देशभरै च किट्टे चुनां करोआने आस्तै इक राष्ट्र इक चुनाव लेई खडेरी गेदी उच्च स्तरी कमेटी दिएं सफारशें गी मंजूरी करी लैता ऐ।
- प्रदेश च त्रीये गेड़ दे असैम्बली चुनांS लेई 34 मेदवारें अपने नांS परताई लैते न हुन त्रीये गेड़ तैहत् 40 विधानभा सीटें लेई 415 मेदवार चुनांS मैदान च ना।

<><><><><><>

Voting

जम्मू-कश्मीर च अज्ज पैहले गेड़ दे असैम्बली चुनांS तैहत् 7एं जिलें दिएं 24 विधानसभा सीटें लेई पूरी रमानदारी कन्नै मतदान होआ। हासल होई दी जानकारी मुजब जम्मू-कश्मीर च संज्ञां 5 बजे तगर कुल 58.19 फीसद मतदान दर्ज कीता गेआ ऐ।

<><><><><><>

Voting Percentage

जम्मू संभाग दे 8 असैम्बली हलकें च संज्ञां 5 बजे तगर 72.13 फीसद मतदान दर्ज कीता गेआ ऐ। मतदान दा कम्म बडुलै 7 बजे सख्त सुरक्षा बंदोबस्तें हेठ शुरु होआ हा जेहड़ा संज्ञां 6 बजे तगर जारी रेया। इक दहाके परैन्त जम्मू-कश्मीर च होआ करदे इनें चुनाएं तैहत् चिनाब घाटी दे त्रै जिलें - रामबन, डोडा ते किशतवाड़ च अज्ज वोट पोआए गे ना। इनें त्रैनें जिलें च कुल 7 लक्ख 14 हजार योग्य मतदाता न ते कुल 64 मेदवार चुनां मैदान च खडोते दे ना। जम्मू-कश्मीर दे मुख् चुनां अधिकारी हुंदे पास्सेआ दिती गेदी जानकारी मुजब, किशतवाड़ जिले दे त्रै विधानसभा हलकें इंद्रवाल, किशतवाड़ ते पाडुर नागसेनी च 77.3 फीसद मतदान दर्ज कीता गेआ। इंद्रवाल च 80.6 फीसद, किशतवाड़ च 75.4 फीसद ते नमीं कायम कीती गेदी पाडुर-नागसेनी सीट लेई 76.80 फीसद लोकें वोट पाने दे अपने हक्कें दा इस्तेमाल कीता ऐ।

इस बारै मती जानकारी देआ करदे न किशतवाड़ दे जिला चुनांS अधिकारी राजेश कुमार शवन।

तोआई डोडा जिले च संझां 5 बजे तगर कुल 69.87 फीसद मतदान दर्ज कीता गेआ ऐ। डोडा जिले दे भद्रवाह असैम्बली हलके च 65.27 फीसद, डोडा हलके च 70.21 फीसद ते डोडा वैस्ट च 74.14 फीसद लोकें वोट पाए ना। ईआं गै रामबन जिले च संझां 5 बजे तगर 67.67 मतदान होआ। जिले दे रामबन हलके च 67.34 फीसद ते बनिहाल हलके च 68 फीसद लोकें वोट पाए ना।

<><><><><><>

PWD Voters

किशतवाङ्ग च शारीरिक चुनौतिएं दा सामना करने आले मतदाताएं पीडब्ल्यूडी प्रबंधित मतदान केंद्रें पर उपलब्ध सेवाएं सुविधाएं दी सराहना कीती ते भारतीय चुनां आयोग दा एह्दे लेई आभार प्रगट कीता जेदे नै उनेंगी वोट पाने च सखाल होई।

<><><><><><>

Polls Others

जम्मू संभाग च चिनाब घाटी दे अलावा पैहले चरण दे चुनांस तैहत अज्ज कश्मीर घाटी दे चार जिलें-अनंतनाग, पुलवामा, कुलगाम ते शोपियां दे 16 असैम्बली हलकें च बी मतदान होआ ऐ। दफा 370 हटने दे बाद प्रदेश च पैहली बारी असैम्बली दे चुनां होआ करदे ना। कश्मीर दे पैहलगाम हलके च संझां 5 बजे तगर सब्बनें शा मता 67 इशारिया 86 फीसद मतदान दर्ज कीता गेआ ऐ। एह्दे परैन्त डीएच पोरा च 65.21 फीसद, कुलगाम च 59.58 फीसद ते सब्बनें शा घट्ट त्राल च 40.58 फीसद मतदान दर्ज कीता गेआ ऐ।

<><><><><><>

Migrants

कश्मीर प्रांतै दिएं 16 विधानसभा सीटें लेई वोट पाने लेई कश्मीरी विस्थापित मतदाताएं लेई जम्मू दिल्ली ते उधमपुर च बनाए गेदे विशेष मतदान केंद्रें च विस्थापित मतदाताएं वोट देने दे अपने अधिकार दा इस्तेमाल कीता। उधमपुर च बनाए गेदे केंद्रें च वोट पाने लेई 904 मतदाता दर्ज न जिंदे च 465 मर्द ते 436 महिलां वोटर शामिल ना। शुरू च वोट पाने आलें दी गिनतरी घट्ट ही पर मगरा बल्ले-बल्ले लोक वोट पाने गित्तै औने शुरू होई गे।

<><><><><><>

Campaign

जम्मू-कश्मीर च बाकी रौह्दे द'ऊं चरणें दे मतदान लेई बक्ख-बक्ख सियासी पार्टिं दे नेता ते प्रचारक, मतदाताएं गी अपने पक्ख च करने लेई पूरी टिल्ल ला करदे ना। एह्दे लेई बक्ख-बक्ख सियासी नेता प्रदेश दिएं बक्ख-बक्ख थाह्लें पर रैलियां ते रोड शो करै करदे ना। प्रधानमंत्री नरेन्द्र मोदी होर कल श्रीनगर दे शेरे-कश्मीर पार्क च इक रैली गी संबोधित करडन ते उंदे इस दौरे लेई उत्थे सुरक्षा दे बडे निग्गर प्रबंध कीते गेदे ना। प्रदेश च चुनाएं दे ऐलान दे बाद घाटी च बीजेपी दी एहू पैहली बड्डी रली होग। बीजेपी नै कश्मीर थमां छडे 19 मेदवारें गी गै चुनां मैदान च तोआरे दा ऐ ते केई सीटां आजाद मेदवारें ते होरनें पार्टिं लेई छोड़ी दित्ती दिआं ना। बीजेपी दा आखना ऐ जे कल होने आहली प्रधानमंत्री हुंदी रैली च 20 जहार शा 30 जहार लोकें दे शामिल होने दी मेद ऐ।

एहदे अलावा बीजेपी दे केई बड़े नेता ते श्रीनगर थमां पार्टी दे मेदवार बी इस रैली च शामिल होइना। प्रधानमंत्री मोदी होर कल रियासी जिले च श्री माता वैष्णो देवी जी दे आधार शिविर कटरा दे स्पोर्ट्स स्टेडियम च बी इक चुनावी रैली गी संबोधित करइना। तोआई कांग्रेस पार्टी बी मतदाताएं गी अपने पक्ख च करने लेई पूरा जोर ला करदी ऐ। कांग्रेस पार्टी दे स्टार प्रचारक सचिन पायलट होर लोकसभा चुनावं दे औंदि चरणें लेई पार्टी मेदवारें दे हक्कै च प्रचार करने दे मकसद कन्नै जम्मू पुज्जी गेदे ना।

<><><><><><>

Cabinet Decisions

सरकारै देश भरै च किट्टे चुनावं करोआने आस्तै इक राष्ट्र इक चुनाव लेई खडेरी गेदी उच्च स्तरी कमेटी दिएं सफारशें गी मंजूरी करी लैता ऐ। अज्ज नमीं दिल्ली च संवाददाताएं कन्नै गल्लबात करदे होई सूचना ते प्रसारण मंत्री अश्विनी वैष्णव होरें गलाया जे साबका राष्ट्रपति राम नाथ कोविन्द हुंदी प्रधानता च खडेरी गेदी कमेटी नै सियासी पार्टिं ते माहिरे-विशेषज्ञें सने बक्ख-बक्ख सरबंधत पक्खें कन्नै तपसीली सलाह-सुत्तर कीता। उनें आखेआ जे इसी द'ऊं चरणें च लागू कीता जाह्ग। वैष्णव होरें दस्सेआ जे पैहले चरण च लोकसभा ते विधानसभा चुनावं किट्टे होइना जदके पंचैत ते नगर पालिकाएं ज्नेय मुकामी निकायें दे चुनावं आम चुनावं दे 100 दिनें दे अंदर-अंदर करोआए जाइना। मंत्री होरें दस्सेआ जे सरकारै विज्ञान ते टेक्नोलॉजी दे खेत्तर गी बढ़ावा देने लेई चंद्रयान-4 मिशन ते षुक्र ग्रैह सरबंधी वीनस ऑर्बिटर मिशन गी मंजूरी दिती ऐ। वैष्णव होरें दस्सेआ जे सरकारै हाड़ी रूत 2024-25 लेई फास्फेट ते पोटैश हैलें पर पोषण आधारित सब्सिडी गी बी मंजूरी दिती ऐ। एहदे पर 24 ज्हार करोड रुपें शा मतें दा खर्च होग। केंद्री मंत्री होरें दस्सेआ जे मंत्रिमंडल नै एनिमेशन, विजुअल इफेक्ट्स, गेमिंग, कॉमिक्स ते एक्सटेंडेड रियलटी लेई इक राष्ट्रीय उत्कृष्टता केंद्र खडेरने दी बी मंजूरी दिती ऐ।

<><><><><><>

Withdrawal

जम्मू-कश्मीर विधानसभा चुनावं दे त्रीए ते खीरी गेइ लेई दाखल नामांकन वापस लैने दे खीरी रोज कल 34 मेदवारें अपने नामांकन वापस लेई लैते। इस गेइ तैहत केंद्र शासित प्रदेश दे 7 जिलें च फैली दिएं 40 विधानसभा सीटें लेई वोट पोआए जाइना। 34 मेदवारें आस्सेया नामांकन वापस लेई लैने दे बाद हून इस गेइ लेई 415 मेदवार चुनावं मतदान च रेही गेना। इस गेइ तैहत पैहली अक्तूबर गी वोट पोआए जाइना। मुख्ख चुनावंs अफसर हुंदे दफ्तर आस्सेया जारी जानकारी मुजब सब्बनें शा मते 16 मेदवारें कुपवाड़ा जिले च अपने नामांकन वापस लैते न जिसले जे साम्बा जिले च कुसै बी मेदवार नै अपना नामांकन नेई परताया। ध्यानजोग ऐ जे कुल 486 मेदवारें नामांकन दाखल कीते हे।

<><><><><><>

CS-Assembly

मुख्ख सचिव अटल डुल्लू होरें जम्मू ते श्रीनगर आले विधानसभा परिसरें गी नमें सिरेआ सौआरने ते उंदे रख-रखाव सरबंधी केई महत्वपूर्ण मामलें दा जायजा लैता। उनें एमएलए होस्टल ते चुनावं प्रक्रिया सम्पन्न होने मगरा विधानसभा दे सुचारू कम्मकाज गी यकीनी बनाने लेई अमले दी दस्तेयाबी दा बी जायजा लैता। मुख्ख सचिव होरें कम्मै गी तेजिया कन्नै पूरा करने पर जोर पायां एहदे कन्नै गै उनें कम्में दे म्यार गी बनाई रखने लेई आखेआ। उनें ढांचागत कम्में कारवाइएं ते हेर दुए पैहलुएं जियां अग्ग थवां सुरक्षा, wi-fi दी सुविधा, लिफ्ट्स दी स्थिति दा बी जायजा लैता। बैठक दौरान नमिं गड्डिं दी खुश-खरीद बारै बी चर्चा होई। मोटर गैरेजस दे सचिव होरें गी

21 नमियां गड्डियां खरीदने लेई आखेआ गेआ ऐ। इस दौरान मंत्रिं दी सुरक्षा ते बुलेट प्रूफ गड्डिं दी दस्तेयाबी दा बी जायजा लैता गेआ।

<><><><><><>

CBSE-Registraiton

केंद्री माध्यमिक शिक्षा बोर्ड सी.बी.एस.ई दे 2025 बरे दे बोर्ड म्तेहानें च हिस्सा लैने आले 9मीं ते 11मीं क्लास दे विद्यार्थिं दा रजिस्ट्रेशन अज्जै थमां शुरू होई गेआ ऐ। सी.बी.एस.ई दी अधिसूचना मुजब रजिस्ट्रेशन कराने दी खीरी तरीक 16 अक्तूबर रक्खी गई ऐ। सी.बी.एस.ई दी मानता हासल स्कूल cbse.gov.in पर अपने बच्चें दा नां दर्ज करी सकदे ना। अधिसूचना च दस्सेया गेया ऐ जे 2025726 आले सत्र च 10मीं ते 12मीं दे बोर्ड मतेयान च ओहू सब्बै विद्यार्थी मतेयान देई सकडन जिंदा नां ते ब्यौरा उंदे स्कूलें दी तरफा दाखल कराई दित्ता गेदा ऐ। स्कूलें गी विद्यार्थिं दा ब्यौरा दाखल करने कोला पैहले सी.बी.एस.ई पोर्टल पर अपने आपै गी बी रजिस्टर करना होग। सीबीएसई नै आखेआ ऐ जे स्कूलें गी एहू पक्का करना होग जे कोई बी अनाधिकृत ते असरबंध यानि कोई बी बाहरला विद्यार्थी जेहड़ा उस स्कूल दा विद्यार्थी नेई ऐ, उंदा ना दाखल नेई कीता जाग। बोर्ड नै इब्बी आखेआ ऐ जे विद्यार्थिं गी सी.बी.एस.ई दे अलावा कुसै होर बोर्ड च दाखल नेई कराया जाई सकदा। स्कूलें गी आखेआ गेदा ऐ जे विद्यार्थी दा नां ते होर जानकारी सेही तरीके ते सलीके सिर दर्ज कीती जा तां जे मगरा विद्यार्थी गी कोई दिक्कत पेश नेई आ।

<><><><><><>

FIR-Criminal Laws

भारतीय न्याय संहिता दे नमें आपराधिक कनूनें तैहत अजें तोड़ी कुल 5 लक्ख 56 ज्हार F.I.R-आं दर्ज कीतियां गेइयां ना। त्रै नमें आपराधिक कनून, जिंदे च भारतीय न्याय संहिता 2023, भारतीय नागरिक सुरक्षा संहिता 2023 ते भारतीय साक्षय अधिनियक 2023 शामिल न, इस बरे पैहली जुलाई थमां लागू होई गेन। गृह मंत्रालय दे इक्क बड्डे अधिकारी नै जानकारी दित्ती ऐ जे एहू F.I.R-आं इस बरे पैहली जुलाई कोला लेइए 3 सितंबर दौरान दर्ज कराइयां गेइयां ना। उनें दस्सेया जे 8 लक्ख कोला मते अधिकारिं गी पुलस अनुसंधान ते विकास ब्यूरो ते राश्ट्रीय फोरेंसिक साइंस युनिवर्सिटी दी तरफा इनें त्रऊं कनूनें बारै आयोजित सिखलाई कार्यक्रमें ते वेबीनारें दी मदद कन्नै सिखलाई दित्ती गई ऐ। नमें आपराधिक कनूनें बारै जानकारी देने लेई इक नमां पोर्टल NCRB-SANKALAN बी तैयार कीता गेदा ऐ।

<><><><><><>

Rijju-Waqf Bill

संसदीय मामले सरबंधी केंद्री मंत्री किरेन रिजिजू होरें आखेआ ऐ जे वक्फ तरमीमी बिल 2024 मुस्लिम समुदाय दी भलाई बेहतरी लेई आंदा गेआ ऐ। आकाशवाणी समाचार कन्नै इक विशेष गल्लबात दौरान रिजिजू होरें आखेआ जे इस बिल दी मदद कन्नै सरकार इस गल्लै गी यकीनी बनाग जे वक्फ दिएं सम्पत्तिं दा अज्जै-कललै दे साइंसी ते पारदर्शी ढंग्गै नै पूरी जवाबदेही कन्नै प्रबंधन कीता जाई सकै। किरण रिजिजू होरें आखेआ जे एहू बिल जिस सांझी संसदीय समिति दे विचार लेई भेजेया गेया ऐ ओहू इस बरे संसद दे सयाले आले इजलास कोला पैहले हफ्ते दे खीरी ध्याड़े तगर अपनी रिपोर्ट सौंपदी देग।

<><><><><><>

Asian-Champions

प्रधानमंत्री नरेंद्र मोदी होरें मर्दे दी एशियाई हॉकी चैंपियन्स ट्रॉफी 2024 जित्ते पर भारतीय टीम गी ममारकबाद दिती ऐ। अपने ममारकी सनेए च प्रधानमंत्री होरें आखेआ जे भारतीय टीम दे शानदार प्रदर्शन ते समर्पण नै समूलचे मुल्खै दा मान बधाया ऐ ते सारे देशवासिएं गी उंदे पर गर्व ऐ। जियां कि पैहले बी खबर दिती जाई चुकी दी ऐ जे कल खेड्डे गेदे फाइनल मकाबले च पिछले बारी दे चैंपियन भारत नै मेजबान चीन गी 1-0 कन्नै हराइए 5मीं बारी एहू खताब अपने नां कीता। भारतीय टीम नै इस जबरदस्त मकाबले दे चौथे क्वार्टर च गोल करिए खताब पर कब्जा बरकरार रक्खेआ। एहू गोल जुगराज सिंह नै कीता। इस टूर्नामेंट च भारत नै इक्क बी मैच नेई हारेया। चीन दुए ते पाकिस्तान त्रीए नम्बरै पर रेहा।

<><><><><><>